

EN la nef de Bonne Nouvelle
 Espoir a chargé Reconfort,
 Pour l'amener, de par la belle,
 Vers mon cueur qui l'ayme si fort.
 A joye puist venir au port
 De Desir, et pour tost passer
 La mer de Fortune, trouver
 Un plaisant vent venant de France,
 Ou est a present ma maistresse,
 Qui est ma douce souvenance
 Et le tresor de ma liesse.

Certes moult suy tenu a elle,
 Car j'ay sceu, par loyal raport,
 Que contre Dangier, le rebelle,
 Qui maintesfois me nuist a tort,
 Elle veult faire son effort
 De tout son pover de m'aidier;
 Et, pource, lui plaist m'envoyer
 Ceste nef, plaine de Plaisance,
 Pour estoffer la forteresse
 Ou mon cueur garde l'Esperance
 Et le tresor de ma liesse.

Pour ce, ma volenté est telle,
 Et sera jusques a la mort,
 De tousjours tenir la querelle
 De Loyauté, ou mon ressort
 J'ay mis; mon cueur en est d'accort.
 Si vueil en ce point demourer,
 Et souvent Amour mercier,
 Qui me fist avoir l'acointance
 D'une si loyalle Princesse,
 En qui puis mettre ma fiance
 Et le tresor de ma liesse.

1. Cette pièce, sous son air d'allégorie, est une suite d'allusions à une entreprise de Bonne d'Armagnac, sa femme, pour le délivrer. (Dangier : l'Anglais.)

Dieu vueille celle nef garder
Des robeurs¹ escumeurs de mer,
Qui ont a Dangier aliance;
Car, s'ilz povoient, par rudesse
M'osteroient ma desirance,
Et le tresor de ma liesse.